



兵機纂卷之五

目錄

致敵

迎敵

應敵

啗敵

驕敵

怒敵

以譎懾敵

以威懾敵

勿當鋒擊敵

敵陣未整先擊

分敵

躡敵

追敵

橫擊敵

首尾擊敵

腹背擊敵



邀歸路擊敵

乘勝驅敵

先聲後實

聲東擊西

將擊必匿

乘勢可擊

因懈可擊

乘無備

乘虛

乘怠

乘敝

乘疲

乘釁

乘亂

兵貴神速

戰不可欲速

目錄終

兵機纂卷之五

方城郭光復纂集

男九圍重校

致敵

孫子曰善戰者致人而不致於人能使敵自致者利之也故敵佚能勞之飽能饑之安能動之

後漢耿弇與張步戰弇先出淄水上與馮異遇突騎欲縱弇恐挫其鋒令步不敢進故示弱以盛其氣乃引歸小城陳兵於內步氣盛直攻弇營與劉歆等合戰弇升王宮壞臺望之視歆等鋒交乃自引

精兵以橫突步陳於東城下大破之

段熲時鮮卑犯塞熲卽率所領馳赴之旣而恐賊驚去乃使驛騎詐齎璽書召熲熲於道僞退潛於還路設伏虜以爲信然乃入追熲熲因大縱兵悉斬獲之

魏司馬懿征遼東公孫文懿解圍攻襄平賊見兵出其後果邀之懿謂諸將曰所以不攻其營正欲致此不可失也乃縱兵逆擊大破之三戰皆捷賊保襄平進軍圍之

後周孟方立將石元佐者善兵而多知方立嘗信用之比信之敗也元佐爲晉將安金俊所得金俊厚遇之問以攻邢之策元佐曰方立善守而邢城堅若攻之必不得志宜急攻其磁州方立來救可以敗也金俊以爲然軍於淦水之西方立果帥兵來救爲金俊所敗

北梁王蒙遜欲伐西涼先引兵攻秦浩疊旣至還屯川巖西涼公歆欲乘虛襲張掖將步騎東出蒙遜恐歆不敢前乃露布西境云巴克浩疊將進攻黃峪歆聞之喜進入都瀆澗蒙遜擊歆殺之

宋韓世忠勒陣向敵遣人語之曰錦衣驄馬立陣前

者韓相公也或危之世忠曰不如是不足以致敵
敵果至殺其導戰二人遂引去

皇明成祖欲往援永平曰李景隆探知我出必來攻
城回師擊之堅城在前大軍在後豎子必成擒矣
諸子曰永平城完糧足可以無憂今宜保守根本
恐出非利上曰守城之衆以戰則不足禦賊則有
餘若軍在城祇自示弱彼得專攻無復他顧甚非
良策出兵於外奇變隨用內外犄角破賊必矣吾
出非爲永平直欲誅九江速來就擒耳吳高怯不
能戰聞我來必走是我一舉解永平之圍而收功
於九江也

上援永平衆請守盧溝扼賊之衝使不徑至城下上
曰天寒冰結隨處可渡一橋何能拒賊舍此不守
以驕賊心使其深入受困於堅城之下此兵法所
謂利而誘之者也

奇法與敵營壘相遠勢力相均可遣輕騎挑之伏兵
以待法曰遠而挑戰欲人之進也

凡致敵來戰則彼勢常虛不往赴戰則我勢常實多
方以致敵之來我據便地而待之無有不勝法曰
致人而不致於人

迎敵

晉劉琨遣將姬澹討石勒或諫澹兵精不可當且深溝高壘以挫其銳攻守異勢必獲萬全勒曰澹軍遠來體疲力竭犬馬烏合號令不齊一戰可擒也何強之有援又垂至胡可捨去大軍一動若澹乘我之退顧身無暇焉得深溝高壘乎此不戰而自滅亡之道斬諫者以孔萇為前鋒督軍後出者斬設疑兵於山上分為二伏勒與澹戰偽收衆而北澹追之伏發夾擊澹大敗而還

後周蘇綽齊神武三道入寇諸將咸欲分兵禦之獨

綽意與周文同遂併力拒竇泰擒之於潼關

隋時高麗主高元掃境以拒列陣數十里衆懼來護兒笑曰吾本為其堅城清野以待王師今來送死當殄之而朝食

唐時吐蕃入寇韓游瓌方壁長武選八百騎迎擊自引兵繼之監軍以為我不可易答曰賊攻豐義今游騎先破則彼大衆不敢前豐義全矣

後梁朱溫將葛從周攻劉守文於滄州其父仁恭來救監軍蔣暉欲縱入城食盡兩困而後取衆頗以為然從周怒曰兵在上將豈監軍所得言且言乃

常談勝敗之機在吾心暉豈足知之逆擊斬三萬
宋太祖征太原曰契丹知我是行必來援彼意鎮定
無備必由此路入卿爲我倍道兼行出其不意破
之必矣銜枚夜發敗之

宋馬知節爲益漢九州都巡檢劉肝爲亂衆踰三千
知節領兵三百敗之招安使上官正召知節計議
知節曰賊黨已踰三千若破邛州制之亦勞不如
出兵迎擊破之必矣果悉屠之

王珪王淪汜淮南珪議出郊掩擊之賊遁去

裴濟知定州契丹三萬來攻濟逆擊於徐河斬數千

級

許古曰元兵踰關朝廷甫知此諸將欺蔽罪也雖然
大兵駐闕鄉境數日不動意者恐吾河南之軍逆
諸前陝西之兵議其後或欲先令覘者伺趨向之
便或以深入入境非其地利而自危所以觀望未
遽進也此時正宜選募銳兵併力擊之且開其歸
路彼旣疑惑遇敵必走我衆從而襲之其破必矣
不行

皇明成祖曰今聞俞瑄不量力欲來攻我城莫若乘
其初至衆心未定易以取也稍緩彼增兵堅守則

難取矣果拔居庸城又曰宋忠擁兵懷來居庸有必爭之理因其未至可先擊之

傳友德因吳友仁援漢州令諸將曰彼勞困遠來聞向大亨兵敗衆必詢詢一戰可克也

提綱敵人遠來疲勞可擊

應敵

淮南子曰靜以合躁治以合亂無形而制有形無爲應變雖未能得勝於敵敵不可得勝之道也敵先我動則是見其形也彼躁我靜則是罷其力也形見則勝可制也力罷則威可立也視其所爲因與

之化觀其邪正以制其命餌之以所欲以罷其足彼若有見急填其隙極其變而束之盡其節而仆之敵若反靜爲之出奇彼不吾應獨盡其調若動而應有見所爲彼持後節與之推移彼有所積必有所虧精若轉左陷其右陂敵潰而走後必可移敵迫而不動名之曰奄遲擊之如雷霆斬之若草木燿之若火電欲疾以邀人不及步鎗車不及轉轂兵如植木弩如羊角人雖衆多勢莫敢格諸有象者莫不可勝也諸有形者莫不可應也

漢魏相曰敵加於已不得已而起者謂之應兵兵應

者勝

諸葛亮卒楊儀退多布鐵蒺藜懿使軍士二千人着軟材平底木屐前行蒺藜悉着屐然後馬步徑進晉周訪與諸軍共征杜弼弼作桔槔打官軍船艦訪作長岐棖以拒之桔槔不得爲害

宋桂陽王休範舉兵尋陽已發東下宋朝惶懼齊高帝議曰昔上流謀逆皆因淹緩至於覆敗休範必遠懲前失輕兵急下乘我無備今應變之術不宜在遠若偏師失律則大沮衆心宜頓新亭向下堅守宮掖東府石頭以待賊至千里孤軍後無支積求戰不得自然瓦解請頓新亭以當其鋒休範果敗

宋將宗慤征林邑林邑王傾國來逆限渠不得渡以貝裝被象前後無際諸將憚之請待軍集始擊慤曰吾已屠城破銳我氣方厲彼已破膽一戰可定何疑焉慤以爲外國有獅子威服百獸乃製其形與象相禦象果驚奔衆皆潰亂慤率兵直渡渠遂克林邑

梁武時侯景反攻陷歷陽帝問討景之策侃求以二千人急據采石今邵陵王襲取壽春使景進不得

前退失巢窟烏合之衆自然瓦解議者謂景未敢
便逼都遂寢其策

唐李靖曰以誘待來以靜待謀以重待輕以嚴待懈
以治待亂以守待攻反是則力有弗逮

南唐李煜募五千勇士襲宋皆素不習戰以暮夜人
持一炬來攻宋師縱其至擊之殲焉

宋岳飛趣襄陽李成迎戰左臨襄江飛笑曰步兵利
險阻騎兵利平壙成左列騎江岸右列步平地雖
衆十萬何能爲舉鞭指王貴曰爾以長槍步卒擊
其騎兵指牛臯曰爾以騎兵擊其步卒合戰馬應
槍而斃後騎皆擁入江步卒死者無數

明鎬因賊縱火牛乃令官軍以槍中牛鼻牛還攻之
賊大潰遁

曹利用使士持巨斧長刀破遁遂斬首以徇
夏聞宋師大舉梁太后問策少將請戰一老將獨曰
不須拒之但堅壁清野縱其深入聚勁兵於靈夏
而遣輕騎抄絕其饋運大兵無食可不戰而困也
從之宋師卒無功

啗敵

列傳夫差將伐齊勾踐朝列士皆有餽賂吳人皆喜

唯子胥懼曰是秦吳也夫諫曰越在我心腹之疾也壤地同而有欲於我夫其柔服求濟其欲也不如早從事焉得志於齊猶獲石田也無所用之越不爲沼吳其恨矣

淮南子曰虞君好寶而晉獻以璧馬釣之胡王好音而秦穆以女樂誘之

宋劉牢之討孫恩恩東走多弃寶物女子於道得脫齊神武使彭樂追周文周文大窘而走曰癡男子今日無我明日豈有汝耶何不急還前營收金寶樂從其言

唐皇甫無逸見王世充篡越王侗自歸追騎及解金帶投之地曰以與爾無相困騎爭下取由是獲免諸將勸史朝義降朝義不悅田承嗣請環車爲營內女子車中以輜重次之伏兵以待旣戰而郤王師逐之爭貨寶賊引奇兵繞出又伏發王師卻數十里止朝義遂走莫州

朱泚官軍急追則遺貨布路士爭取卒不前賊得遁高駢將畢師鐸出兵次第爲陣已與王朗爲左右翼成列久之楊行密乃出委輜重於壁以羸兵守之伏精騎數千於傍行密先犯駱玄真短兵接僞北

兵機策卷之五
師鐸諸軍奔壁爭取金玉貨糧伏謀而出行密引
輕兵躡其後俘傍午

李繼昌賊喻雷燒遺金帶偽納之賊懈不設備因掩
殺之

皇明成祖令王真等縛草置囊中若束帛狀載馬上
遇賊來追則弃之於地

奇法凡與敵戰其將愚而不知變可誘之以利彼貪
利而不知害可伏兵以擊之其軍可敗法曰利而
誘之

驕敵

楚大饑庸人叛楚或曰庸師衆不如且起王卒合而
後進楚將潘阡曰不可姑又與之遇以驕之彼驕
我怒而後可克先君蚡胃所以服陞隰也又與之
遇七遇皆北庸人曰楚不足戰矣遂不設備楚分
二隊伐庸滅之

智伯索地於魏桓子任章曰君與之地智伯必驕彼
驕而輕敵隣國懼而相親以相親之兵待輕敵之
國智氏之命不長矣周書曰將欲敗之必姑歸之
將欲取之必姑與之

隋兵大舉聞宣帝崩班師遣吊修敵國禮稱姓名頓

首後主益驕

唐高祖起太原致書李密呼兄帝推順以驕其志使拒東都兵不得西

議先擊吐蕃相閻立本曰民饑未可師將契苾何力曰吐蕃極西恐兵到竄伏無得至春復侵吐谷渾請勿救使疑吾力困而驕之一舉可滅也

李勣以其軍初傷夷士氣未完乃不爲斥候部伍或有言者勣曰賊方安袁公之寬吾不欲使震而備我乃令於軍曰天子知勣能忍耻故委以撫養戰非吾事也衆信而安之蔡人以嘗敗辱高霞寓等又勣名非夙所畏者見之不爲備

王武俊夜決河斷馬燧餉路燧計窮與滔素姻家遣使謝滔曰老夫不自量與諸君遇王大夫善戰天下無前吾固以敗幸公圖之使老夫得還河東諸將亦罷兵吾爲言天子以河北地付公滔亦陰忌武俊盛且不制即謂武俊曰王師旣敗馬公卑約如此不宜迫人以險答曰燧等皆國名臣連兵十萬一戰而北貽羞國家不知何面目見天子耶彼行不五十里必返拒我滔固許之燧至魏縣堅壁自固師復振滔慚謝嫌隙始構矣

宋蘇軾曰自古用兵莫如曹操其破滅袁氏最有巧思袁紹以十倍之衆大敗於官渡僅以身免而操歛兵不追者何也所以緩紹而亂其國也紹歸國益驕忠賢就戮嫡庶並爭不及八年而袁氏無遺種也向使操急之紹未可以一舉蕩滅若懼而修政用田豐而立袁譚則成敗未可知也

張俊請討馬進聞命就道且曰我已得洪州破賊決矣乃歛兵若無人者金鼓不動令將士登城者斬居月餘李成黨馬進以大書牒來索戰俊以細書狀報之賊以俊爲怯俊謀知賊怠乃議戰

皇明已獲宋忠諸將頗有喜色上曰區區勝之何足喜也苟勝大敵喜當何如夫喜則易驕驕則不戒不戒則敗機萌矣孔子所謂必也臨事而懼好謀而成者也諸將咸頓首稱善

奇法敵人強盛未能必取須當卑詞厚禮以驕其志候其有釁可乘一舉破之法曰卑而驕之陸遜之待關羽是也

怒敵

孫子曰忿速可侮

蜀諸葛亮遺司馬懿巾幘辱之使戰懿不應

晉姚襄據黃洛前秦苻堅遣將黃眉鄧羗等討之
襄深溝高壘固守不戰鄧羗說黃眉曰傷弓之鳥
落於虛發襄頗爲晉將桓溫等所敗銳氣喪矣今
固壘不戰是窮寇也襄性剛狠易以剛動若長驅
鼓行直壓其壘襄必怒而出師可一戰擒也眉從
之遣羗軍於襄壘果怒盡銳出戰羗僞不勝引騎
而退襄追之羗回騎拒襄眉至大戰斬之盡俘其
衆

隋杜伏威聚徒數萬煬帝遣陳稜以兵八千討之稜
不敢戰伏威遺稜婦人之服以激怒之并致書號
爲陳姥稜大怒悉衆而來部將射中伏威額伏威
怒曰不殺汝我終不拔箭稜軍大潰

唐時吐蕃相婢婢遣將擊恐熱於河州南伏兵四萬
龐結心據山射書極罵恐熱怒甚盛兵出閉結心
僞北恐熱追數十里伏發又值河溢溺死甚衆恐
熱單騎遁

皇明成祖欲移軍南行衆曰軍士多出取糧今起營
恐有後至者城中出兵掩襲非便也上曰卿等無
慮我以計破賊要使一人行賊不敢輕犯乃伏兵
於九里山先藏百餘騎於演武亭令數騎來往城

下誘之且戒之曰爾等在城下解鞍息馬示以安閒若敵不出謾罵以挑之賊必怒而逐爾可按轡徐行引其渡河卽舉砲我放兵馳擊之賊衆必懼急回渡河倉皇之頃必成擒矣數騎如上旨往來城下賊不敢出乃焚其廬舍大罵之徐發一矢射城上至暮則去明日復如是賊不勝憤果開門以兵五千追而渡河砲嚮伏發上以數騎出西門斷其歸路腹背夾擊之後單騎往來城下敵見不敢出矣

以譎懾敵

戰國策胥臣以虎皮蒙馬先犯陳蔡陳蔡奔楚右師潰

符堅將慕容垂救襄陽命三軍人持十炬火繫於木枝光照數十里晉將桓冲懼退還

後魏宗室禎召新蔡襄城蠻魁三十餘人盛裝武置酒使觀射自發數箭皆中左右善射者二十人竝中出死囚服軍衣命不中責斬之又預教左右取死囚十人着蠻衣云是鈔賊禎臨坐僞舉目瞻天微有風動禎謂蠻曰風氣少暴似有鈔賊入境不過十人當在西南五十里許禎告諸蠻曰爾鄉里

作賊如此合死皆叩頭曰合萬死卽斬之乃遣還
諭諸蠻大服自是無暴掠

周某雲曰夷狄之馬初不見虎頭楯若令此楯在前
破之必矣獻文從之

永王璘及肅宗命討判官李銑等夜多燒火人執兩
炬以疑之璘軍以火應之璘懼以爲官軍悉濟矣
宵遁

唐王武俊以騎三千方陣橫進朱滔繪帛爲狻猊象
使猛士百人蒙之鼓譟奮馳賊馬驚亂隨擊大破
之李惟岳焚營而遁

以威懾敵

春秋時楚伐吳鍼尹固與王同舟王使執燧象以奔
吳師

吳朱然攻魏圍樊懿救之挑戰然不動懿於是休戰
士簡精銳申號令示必攻之勢吳軍夜遁

武帝伐吳杜預陳兵江陵遣周旨伍巢等率奇兵泛
舟夜渡以襲樂鄉多張旗幟起火巴山出於要害
之地以奪賊心

宋雍州刺史袁顓反劉胡攻錢溪不下僞言已下故
沈攸之以錢溪所敗軍人傷殘手足瘡瓦膝行者

盡送令還以沮其衆

北齊廣德主孝珩文襄第二子後主自晉州敗奔鄴
詔議孝珩以大敵旣深事藉機變宜使任城王頊
幽州道兵入土門揚聲趣并州獨孤求業領洛州
道兵趣潼關揚聲取長安臣請領京畿兵出滏口
鼓行迎戰敵聞南北有兵自然潰散

後周陸騰獲叛民李廣嗣其黨求釋騰謂將士曰吾
若不殺廣嗣等可謂墮軍實且長寇讐事之不可
者也任公忻豎子乃敢要人卽斬以首示之賊沮
氣奮擊盡獲

唐太宗從六騎與可汗隔水語衆軍至旗鎧光明部
隊靜嚴虜大駭蕭瑀以帝輕敵帝曰我思熟矣非
爾所知虜掃地入寇以我新有內難謂不能師若
闔城彼且大掠吾境故我獨出示無畏又盛兵使
知必戰不意我能沮其始謀彼入吾地深懼不能
返故戰則克和則固制賊之命在此舉果請和許
之

王鏐回鶻等入朝欲示威武悉軍迎送列五十里旗
幟光鮮戈鎧犀密回鶻恐不敢仰視

祿山反杲卿傳檄河北言王師二十萬入土門遣郭

兵機策 卷之五
仲邕領百騎爲先鋒馳而南曳柴揚塵望者謂大軍至日中傳數百里賊圍饒陽者弃甲走各郡竝斬僞刺史

李光弼擒周摯等思明未知猶攻南城光弼驅所俘示之思明大懼築壘以拒官軍

宋太宗選勇士數百人教以劍舞皆能擲劍空中躍其身左右承之妙絕無比見者無不恐懼出劍士示北使北使懼形於色每巡城耀武賊衆破膽郝玘獲虜必剝剔歸屍虜大畏道其名以怖啼兒何繼筠敗契丹於陽曲北宋太祖命以所獲首級

甲示於城下城中畏氣

蘇軾曰今秉常雖爲母族所篡世家大族亦未肯俯首爲用今合勢抗王師如左右手此同舟遇風之勢也法當緩之願選大臣宿將素爲賊所畏服者使兼率五路聚衆兵境上號稱百萬蒐乘補卒牛酒日至金鼓之聲聞於數百里間外爲必討之勢而實不出境多出金帛遣間使辯士離壞其黨與且下令曰尺地吾不愛一民吾不有也其有能以地與衆降者卽以封之有敢攘其地掠其人者皆斬不出一年必有權均力敵內自相疑者人情不

遠各欲求全及王師之未出爭爲先降以邀重賞
陛下因而分裂之卽用其酋豪命以爵秩基布錯
峙務使相讐如漢封韓呼邪通西域故事不過於
要害處築一城屯數千人置一將以護諸部可使
數百年而內保境不煩城守餽運豈非萬全之至
計哉

皇明曹良臣元也速侵通州城中守兵千人守將良
臣謂部將曰吾兵少不可與戰彼衆雖萬餘然亡
國之後屢挫之兵可以計破乃遣人於沿河舟中
各樹赤幟亘三十餘里鉦鼓之聲相聞也速望之

驚駭引衆遁去

李文忠守嚴州士誠兵至出奇敗之取所斬俘馘載
巨筏中乘流而下水寇見之亦遁

傅友德克階文以木牌數千書克階文綿漢日月順
流達湯和蜀守者見之爲之解體

勿當鋒擊敵

孫子曰銳卒勿攻強而避之少而逃之又曰朝氣銳
晝氣惰暮氣歸善用兵者避其銳氣擊其惰歸此
理氣者也

周亞夫至淮揚問故父絳侯客鄧都尉曰策安出客

曰吳兵銳甚難與爭鋒楚兵剽輕不能久方今爲將軍計莫若引兵東北壁昌邑以梁委吳吳必盡銳攻之將軍深溝高壘使輕兵絕淮泗口塞吳餉道使吳梁相敝而糧食竭乃以全制其弊破吳必矣

漢趙充國虜數千百騎來出入軍傍充國曰吾士馬新倦不可馳逐此皆驍騎難制又恐其爲誘兵也擊虜以殄滅爲期小利不足貪令軍勿擊

後漢光武詔徵鄧禹還曰毋與窮寇爭鋒

晉劉裕討南燕慕容超超召羣臣議拒晉師大將公孫五樓曰吳兵輕果利在速戰初鋒勇銳不可爭也宜據大峴使不得入曠日延時沮其銳氣徐簡精騎循海而南絕其糧道別勅段暉率兗州之衆腹背擊之上策也

唐李孝恭討蕭銑李靖在軍中舟師叩夷陵銑將文士洪以卒數萬屯清江孝恭欲擊之靖曰不可士洪健將下皆勇士今新失荆門悉銳拒我此救敗之師不可當宜駐南岸待其氣衰乃取之孝恭不聽留靖守屯自往與戰大敗還

趙晃曰賊崇勢方盛未易敵也宜持重以挫其鋒

張詠召上官正謂曰賊始發不三四日破數郡勢方銳不可擊氣驕敢逼吾城乃送死耳

葛懷敏欲掩襲夏人趙珣謂曰敵遠來衆倍鋒銳莫若依城布柵以遏其路守鎮戎城以便餉道俟其衰擊之此必勝之道也不然必爲賊所圍不聽夏人引鐵騎來犯懷敏遁走

孫儒屯溧水循山構壁楊行密遣李神福屯廣德計曰兵倍不戰當避其銳驕之乃退舍儒衆以爲怯守者懈神福夜襲走之

皇明成祖與賊戰左右曰賊衆我寡難與久持且就大軍併力擊之上曰此賊奇兵精銳盡在此故吾獨當之以沮其勢使諸將得以致力於賊衆若我就大軍彼以全力形勢相懸數倍我衆殆難破矣於是以前精騎數十復進戰不已又曰敵引衆遠來銳意求戰彼謀知大軍南行必襲我後若敗其前鋒則賊衆奪氣譬之利兵挫折鎔鏗其刃自鈍我按甲於此以待賊至姑少待之

提綱賊入境內初來氣銳不可當頭截殺俟其四散搶掠其衆必分我當潛兵於鄉村擊之或待其將歸預爲分兵伏於歸路從三分之二以邀擊之

凡暴寇來劫掠牛馬財貨不可輕動其初至氣銳犯之未必勝候其去則邀擊之

敵陣未整先擊

後漢曹公討鮮卑鮮卑逆軍甚盛公登高觀虜陣不整縱兵擊之使張遼爲先鋒虜大敗

晉將王浚討石勒石勒將張賓曰今未桎卒最精勇可勿復出戰示之以弱速鑿北壘爲突門二十餘道候賊列守未定出其不意直衝未桎帳敵必震惶計不及設所謂迅雷不及掩耳未桎之衆旣奔餘自摧散擒未桎之後王浚指辰而定勒納之擒

未桎

周文至潼關賈泰卒聞軍至惶懼依山爲陣未及戍列周文縱兵擊破之盡俘其衆斬泰傳首長安

周羅暉從楊素擊突厥達頭可汗虜衆甚盛羅暉曰素曰賊陣未整請擊之素許焉與輕勇二十騎直衝虜陣從申至酉短兵屢接大破之吐萬緒以劉元進陣未整以騎突之遂潰

宋太宗征太原時節度使何繼筠把石嶺關率數千騎禦之虜至乘其未成列遠麾兵擊之虜衆大潰追奔數千里

皇明成祖追李景隆至禹城駐營日晡起行倍道而進且至濟南景隆衆尚十餘萬倉卒布戰未定上以精騎赴之左右控馬止勿進上曰迅雷之下不及掩耳擊殺賊不得不急苟緩之賊陣定我人少恐難破遂進擊賊復大敗斬首萬餘級獲馬萬餘奇法敵人初來戰勢未定行列未整先以兵急擊之則勝法曰先人有奪人之心

通典曰新集可擊始至行陣未定

敵人人馬未定旌旗未整陣勢未完可乘勢攻擊必勝之機也

分敵

國語越伐吳越王軍于江南乃中分其師以為左右軍以其私卒六千人為中軍將舟戰於江及昏乃令左軍銜枚沂江五里以須夜中乃令右軍涉江鳴鼓中水以須夫師聞之大駭曰越人分為二師將以夾攻我師乃不待旦亦中分其師將以禦越越乃令中軍銜枚潛涉不鼓不譟以襲攻之吳師大敗

袁生說漢王曰漢與楚相距滎陽數歲漢常中困願君王出武關項羽必引兵南走王深壁令滎陽成

臯間且得休息使韓信等平河北趙地連燕齊君
王乃復走滎陽未晚也如此則楚以備多力分漢
將得休息復與之戰破楚必矣漢王從其計

後漢末曹操與袁紹相持官渡紹遣顏良等攻東郡
太守劉延于白馬紹引兵至黎陽將渡河曹公北
救延荀攸說公曰今兵少不敵分其勢乃可公到
延津若將渡兵向其後者紹必西應之然後輕兵
襲白馬掩其不備顏良可擒也

吳周瑜上疏曰劉備以梟雄之姿而有關羽張飛熊
虎之將必非久屈爲人用者愚謂大計宜徒備置
吳盛爲築宮室多其美女玩好以娛其耳目分此
二人各置一方使如瑜者得挾與攻戰大事可定
矣

魏鄧艾是時并州右賢王劉豹并爲一部艾上言自
單于在外莫能牽制長卑誘而攻之使來入侍由
是羗夷失統合散無主以單于在內萬里順軌今
單于之尊日疏外土之威寢重則胡虜不可不深
備也聞劉豹部有叛胡可因叛割爲二國以分其
勢長卑功顯前朝而子不繼業宜加其子顯號使
居鴈門離國弱寇追錄舊勲此爲備邊長計也

梁將王僧辯陳霸先之破侯景也耀軍於張公洲景
覩之不悅曰彼軍上有如堤之氣不可易也因率
鐵騎萬人聲鼓而進霸先謂僧辯曰善用兵者如
常山之蛇首尾相應賊今送死欲爲一戰我衆彼
寡宜分其勢僧辯然之乃以強弩攻其前輕銳蹂
其後大兵衝其中景遂大潰弃石頭而遁

唐李靖隨河間王孝恭討蕭銑于江陵銑悉兵拒戰
將戰靖止之曰楚人輕銳難與爭鋒今新失荆門
盡兵出戰此救敗之師也策非素立勢不能久不
若且泊南岸一日不戰賊必兩分留輕兵以抗我

退羸師以自守此卽勢隳力弱擊之必捷今若急
之彼必併力死戰孝恭不從遣靖按營自以銳師
求戰果敗

李勣或勸遂取吳房勣曰不可吳房拔賊力專不若
留之以分其力

秦鳳都監康謂曰夏未臣附屢肆兵者以我勢分于
隄備兵未練而賞罰失當爾若擇銳結伍伺彼之
動聚則先擊散則復襲則彼分而我聚以衆擊寡
可得志也詔下其事於諸道

詔涇原劍南山南深入窮討分其兵勿令專向東方

宋王仲寶元昊寇延州仲寶將兵至賀蘭谷以分兵
勢

金古里甲石倫乞量分精兵以增臣力仍令陝西州
郡近河東者給之資糧更令南路諸軍綴敵之南
以分其勢如此太原可復

皇明太祖曰爾此用師孰先常遇春對當直擣姑蘇
姑蘇破餘郡可不勞而下上曰不然士誠起鹽徒
與張天騏潘元明皆強梗之徒相爲手足士誠苟
至窮蹙天騏輩懼俱斃必併力救之今不先分其
勢而遽攻姑蘇若天騏出湖州元明出杭州援兵

四合難以取勝若先出兵攻湖州使其疲於奔命
羽翼旣披然後進取姑蘇取之必矣遇春猶執前
議太祖作色曰湖州失利吾自任之

奇法曰敵衆設虛形以分勢彼必分以備我敵分我
專爲一其卒自衆以衆擊寡必勝法曰形人而我
無形

善戰者使我常專使敵常分

心疑者比力分者弱能分人之兵疑人之心則錙銖
有餘不能分人之兵疑人之心則數倍不足

躡敵

齊王琳既敗陳吳明徹因東下陳遣侯瑱侯安都拒之瑱等以琳軍方盛引軍入蕪湖避之時西南風急琳謂得天道將直取揚州瑱等徐出蕪湖躡之遂擊敗

契丹澶淵既盟諸將皆請以兵會界河上邀其歸徐以精甲躡其後殲之虜懼求哀於上

契丹潛議入寇上遣李繼隆護輜重契丹將于越率數萬邀之尹繼倫適領步騎千人巡徼路遇之越徑趨大軍過而不顧繼倫謂其下曰寇蔑視我爾彼南出而捷還則乘勝趨我而北不捷亦且洩怒

於我將無遺類矣爲今日計但當捲甲銜枚以躡之彼銳氣前趨不虞我之至力戰而勝足以自樹縱死猶不失爲忠義豈可泯然而死爲胡地鬼乎衆皆忿激從命繼倫令軍中秣馬俟夜人持短兵躡其後行數十里天未明越去大軍四五里會食訖將戰繼隆方陣于前以待繼倫從後急擊殺其相皮室衆驚潰越方食失箸爲短兵中臂創甚乘善馬先遁衆見大將奔北因大潰自相蹂殘死者無數虜戒曰當避黑面大王又繼倫曰貪蛇勇行必忘其尾

遼蕭思温因周軍數日不動與諸將議曰敵衆而銳
戰不利則有後患不如屯兵以老其師躡而擊之
可以必勝諸將從之

奇法與敵相攻若敵無故退歸必須審察果力疲糧
竭可選輕銳躡之若是歸師則不可遏也法曰歸
師勿遏

追敵

晉大夫史駢知秦師將遁曰薄諸河必敗之晉裨將
胥甲趙穿曰死傷未收而弃之不惠也不待期而
薄人於隘無勇也乃止秦師果夜遁

前漢趙充國引兵至先零所在虜久屯聚解弛望見
大軍弃車重欲渡湟水道阨狹充國徐行驅之或
曰逐利不宜徐行充國曰此窮寇不可迫也緩之
則走不顧急之則還致死諸校皆曰善

後漢賊王國圍陳倉不能拔解去皇甫嵩因進兵擊
之董卓曰不可兵法窮寇勿追歸衆勿追今我追
國是追歸衆迫窮寇也因獸猶聞蜂蠆有毒况大
衆乎嵩曰不然前吾不擊避其銳也今而擊之待
其衰也所擊疲師非歸衆也國衆且走莫有鬪志
以整擊亂非窮寇也遂獨進擊之使卓爲後拒連

戰大破之斬首萬餘級國走而死卓大慚恨由是
忌嵩

蜀諸葛亮曰曹操之衆遠來疲敝聞追豫州輕騎一
日一夜行三百餘里此所謂強弩之末勢不能穿
魯縞者也故兵法忌之曰必蹶上將軍

亮卒諸將燒營而遁司馬懿出兵追之長史楊儀反
旗鳴鼓若將向懿者懿以歸師不之迫儀結陣而
去

晉參軍王貢矯陶侃命以杜魯爲前鋒大都護斬賊
王冲侃召魯不到貢又懼矯命與魯同反周訪選
精銳八百人自行酒飲之敕不得妄動聞鼓音乃
進賊未至三十步訪親鳴鼓將士皆騰躍奔赴魯
遂大潰殺千餘人訪夜追之諸將請待明日訪曰
魯遑勇能戰向之敗也彼勞我逸是以克之宜及
其衰乘之可滅鼓行而進遂定漢沔

南齊將將圍豫州崔浩曰牡馬護群牝馬戀駒驅馳
難制不得水草未過數日朋聚而困敝

梁宗室恭時衡州刺史武會超子姪縱暴州人朱朗
反恭緩服徇賊示以恩信賊服勇夜退下請追恭
曰賊以苛政致叛非有陳吳之心緩之則自退急

之則併力諸軍置之明日朗請降恭受之一無所
問斬子姪

後魏傅末設伏於右道擊裴叔業後軍破之左右欲
追之末曰弱卒不滿三千彼精甲猶盛非力屈可
敗自墮吾計中耳既不測我之虛實足喪其膽俘
此足矣何暇逐之

張袞道武追蠕蠕因糧盡帝欲殺副馬充三日食云
卿曹知吾問三日糧意乎蠕蠕奔走數日畜產失
飲至水必留計其道程三日足及輕騎卒至出其
不意彼必驚散其勢然矣

陳元康芒山之戰西師既敗神武會諸將議進取策
或以人馬疲瘦不可遠追元康曰兩雄交爭歲月
已久今得大捷便是天授時不可失必須乘勝追
之神武曰若遇伏兵孤何以濟元康曰前沙苑還
軍彼尚無伏今者奔敗何能遠謀捨之必成後患
神武不從神武疾篤謂文襄曰芒山之戰不用元
康言方貽汝患以此爲恨死不瞑目

西周突厥寇甘州上令侯莫陳昶擊之宇文弼曰黠
虜之勢來如激矢去若絕弦若欲追躡良爲難及
宜選精騎趨祈連之西賊若收軍必自蓼泉之北

此地險隘兼復下濕度其人馬三日方渡援轡追討何虜不及彼勞我逸破之必矣若邀此路真上策也不用

唐李靖兵法諸戰銳等隊打賊敗其駐隊別量抽驍健二十人逐比其輜重隊遙叫作聲援不得輒動跳盪隊奇兵隊趁賊退不得過百步如審知賊徒敗散仍須取機追逐

秦王敗薛仁果將宗羅睺率騎追奔於是悉軍馳之曰勢如破竹不可失也夜半至折墪遲明圍合仁果降衆賀且問曰羅睺雖破而賊城尚堅王能下之何也王曰羅睺健將非急追之使得還城未可取也故吾使賊不及計是以克之

蘇定方追虜會大雪軍中請須霽定方曰今零晦風冽虜謂我不能師掩其不虜可也緩則遠矣省日兼功上策也

高霞寓先勝吳元濟又戰賊僞奔霞寓窮追伏發死傷畧盡

後唐莊宗追梁將劉鄩時霖雨積旬鄩倍道兼行皆疾陷泥多死

莊宗追契丹雪深五尺虜乏芻糧人馬斃踣于道追

及大破之

劉崇引契丹擾晉州樞密使王峻使藥元福等追又止元福謂諸將曰劉崇召契丹擾邊志在疲敵中國今兵未交卽遁宜追奔深入以挫其勢諸將畏懦遂止

宋時賊以騎三萬來戰佯北范仲淹戒勿追過河河外果有伏賊失計引去衆服公不可及

狄青戍涇原日嘗與虜戰大勝追奔數里虜忽壅遏山嶠知其前必遇險士卒皆欲奮擊青遽鳴鉦止之虜得引出險其處果臨深澗將佐悔不擊青獨曰不然奔亡之虜忽止而拒我安知非謀軍已大勝殘寇不足利得之無所加重萬一落其術中存亡不可知寧悔不擊不可悔不止

張玘追金人至試劔關爭門蹂踐死者百人

金太祖追遼帝戒前鋒曰彼若深溝高壘未可與戰卽偵伺巡邏勿令遁去以俟大軍若其無備便可擊也

通典若其賊退步趨不得過三十步亦不得卽乘馬趨審知賊退撩亂驚怖然後騎馬逐北仍與諸隊齊進其折衝果毅聞時雖暫下馬賊敗卽任騎馬

兵機集 卷之五
騰逐羗大潰馬援以兵少不得窮追收其穀糧畜
產而還

奇法如我衆敵寡彼必畏遁切勿追之蓋物極則返
故也宜整兵緩追法曰窮寇勿迫趙充國得之矣
凡追奔逐北須審真僞若旗齊鼓應號令如一紛紛
紘紘雖退走非敗也必有奇也當須應之若旗參
差而不齊鼓大小而不應號令譟囂而不一此真
敗却也可以力逐法曰凡從奔勿怠敵人或止於
路則慮之

提綱戰勝逐奔不可遠追約一二里則止須收軍勅
軍整隊而襲之不然一恐窮寇返鬪一恐彼有伏
兵須當出左右傍哨遠遠襲之須令乖覺偵覘如
彼潰散我亦分隊逐之令彼衆不得聚如彼潰而
復聚者我可設疑而撓之使彼不暇食息伺其疲
倦我乃悉力攻之以獲全勝

橫擊敵

晉師陳於萃城濮之戰楚師馳之原軫卻溱以中軍
公族橫擊之

高歡與爾朱兆戰歡軍小不利兆等方乘之高昂與
蔡雋以千騎自栗園橫擊之兆軍大敗

宇文泰與高歡合戰沙苑李弼率鐵騎橫擊之歡兵中絕分爲二遂大破之

唐高祖率兵擊盜母端兒至龍門縣高祖親率十餘騎橫出擊之賊大潰

高麗大將泉男生內附高宗遣龐同高倂迎之男生弟男建率國人逆擊同等召薛仁貴爲後援同等進至今山爲賊所敗高麗乘勝而進仁貴橫擊之賊大敗斬首五萬餘級

首尾擊敵

唐鄭從謹欲四道置兵道率三萬畜力伺利一日俱縱則蔡首尾不救可以責功執政不喜

宋葉清臣虜遁然後選擇驍勇遏絕歸路設伏出奇邀擊首尾若不就擒亦且大敗矣

范仲淹願詔龐籍兼領環慶以成首尾之勢

劉光世移兵屯江州爲屏蔽光世旣至日置酒高會金人自黃州渡江凡三日無知之者比金人至遂遁太后退保虔州馮楫貽書光世言賊深入最兵家之忌進則距山退則背江百無一利而敢如此橫行者以前無抗拒後無襲逐也大尉儻選精兵自將來攻而開一路令歸伏兵掩之可使匹馬不

兵機策卷之五
還光世不能用

皇明太祖諭湯和等伐蜀命率水陸之師分道竝進首尾攻之使彼疲於奔命勢必當克

太祖因遣將攻西蜀諭傅友德曰蜀人聞吾西伐必悉其精銳東守瞿塘北守金牛以拒我師彼謂地險兵難猝至若出其意外直擣階文門戶旣隳腹心自潰矣兵貴神速但患不勇耳又因友德克諸州詔諭曰傅將軍冒險深入克諸州今次干平川蜀無險可恃正可水陸夾攻使彼首尾受敵疲于奔命破蜀之機但在今日若候水退豈不失機誤事朕前所語爾獨不記憶乎何怯之甚也

兵法賊入我境廣張人馬虜掠孳畜驅駕車乘搬載積聚擁生口欲歸者不可使人馬當路衝擊彼衆我寡難以應敵但發人馬別路數道料賊回程於要害之處多設奇伏分兵左右卽以銳騎一進一退一出入使賊欲進不得欲往不安或攻其首或攻其尾或邀其中及使壯勇之士專逐其主將無令計掠而歸彼旣主管不定必弃其輜重遁去腹背擊敵

宋柳元景爲隋郡太守蠻斷驛道欲攻郡郡內力少

糧乏元景設方畧得六七百人分五百屯驛道或
曰蠻將逼城不宜分衆元景曰蠻聞郡遣重戍豈
悟城內兵少退且表裏合勢於計爲長會蠻垂至
乃遣驛道兵潛出其後戒曰火舉馳進前後俱發
蠻衆驚擾投殞水死者千餘斬獲數百郡境肅然
梁武將呂僧珍守白板齊東昏將李居士薄城僧珍
謂衆曰今力旣不敵不可與戰可勿遙射須至塹
裏當并力破之俄而皆越塹拔柵僧珍分人上城
矢石俱發自率馬步三百人出其後守陴者復越
城而下內外齊擊居士等應時奔散

比齊高澄爲勃海王遣將慕容紹宗追侯景景謂曰
欲送客耶將定雌雄耶紹宗曰將決戰遂順風以
陣景閉壘頃之乃出紹宗曰景多詭好乘人背使
背之果如其言景命戰士皆被短甲短刀但低視
斫人脛馬足遂敗紹宗

隋漢王諒反遣趙子開據高壁嶺布陣五十里楊素
令諸將以兵臨之自引兵入霍山緣崖谷而進直
指其營一戰破之殺獲數萬

唐秦王因薛仁果糧乏不得戰其下多降王策賊可
破遣將擊宗羅睺于淺水原戰酣王以勁兵搗其

背羅喉敗

吐谷渾寇邊獨李道宗帥偏師追之兼行倍道去大軍十日追及之賊據險苦戰道宗潛遣千餘騎踰山襲其後表裏受敵一時奔潰

郭子儀悉軍追賊橫貫其營賊張兩翼包之官軍却楚馬殷鄉人夏侯陟教殷以奇兵出迪田踰澗山據江爲壁伏兵于莽誘龐勛渡江勛見士未陣爭出鬪殷分兵襲其壁麾瀕江軍夾擊勛大敗

宋初契丹入塞太宗選驍勇使押戰分爲百隊伏沿邊要害地與大軍表裏奮擊晝則虛張旗幟依蔽林木使其可疑夜則潛伏郊野多用火鼓使其可懼彼腹背受敵無所俘掠我則首尾相爲援也

折可適智斬夏烽卒得勝回意彼必追回次檉楊溝正午駐營分據西山曰彼若躡吾後腹背受敵必敗果舉軍來可適所部八千轉戰至高嶺廼從間道趨洪德設伏邀其歸路敵至伏發衝之大敗宗澤知金人至乃選精銳數千使繞出敵後伏其歸路金人方與劉衍戰伏兵起前後夾擊金人敗

吳玠拒險作三陣環以劍盾行馬金宗璋遣兵由別路自後擊之又以二千人當其前以強弓射之玠

大敗

金徒單克寧與契丹窩幹兵遇於長樂副元帥完顏謀衍使伏兵於左翼之側賊二萬躡吾後又以騎四百突出左翼伏兵之間欲繞出陣後攻我克寧與善射二十人拒之衆曰賊衆我寡不若與伏兵合擊或與大軍相依可以萬全克寧曰不可若賊出戰後則前後夾擊我敗矣大軍不可俟也於是奮擊敗賊乃却

皇明廖永忠攻瞿塘以敵據關口設鐵索飛橋亘江上舟不得進乃密遣壯士數百人舁小舟衣青箬衣緣山伏草木中行渡關人各持糗糧挈水筒以禦饑渴魚貫出山石間守關者不覺既渡險夜以小舟入江繞出敵背永忠等與約期度已入江乃率精兵出黑葉渡分兩道夜五鼓以一軍攻其陸寨一軍攻其水寨將士皆以鐵裹船頭置火鎗火器前進黎明蜀人盡銳來攻永忠已破陸寨將士舁舟者自上流俱發揚旗鼓譟而下蜀人大駭不知其兵何從也下流舟師竝進夾攻大破之焚三橋橫江鐵鎖須臾鎔絕斬溺死者無筭

總要北狄入寇帝詔分兵三路以六千騎屯廣信軍

將佐三員領之五千騎屯保州將佐三員領之五千騎屯北平軍將佐三員領之以抗賊鋒始至勿與鬪待其氣衰披城誘戰若其南越保州與大軍遇則令廣信之師與保州兵會使腹背受敵而乘便掩擊若其不攻定州縱軼南侵則復會某兵合勢應援

邀歸路擊敵

外傳子囊伐吳吳不出而還子囊斂以吳爲不能而弗傲吳人自臯舟之隘要而擊之楚人不能相救吳人敗之

